

Date – 09/02/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Union Railways minister Pu Ashwini Vaishnaw an vawiin khan Sairang leh Silchar inkara passenger phur rel service thar a vailiam.
2. Kangmei Ven Hapta -Fire Prevention Week 2026 chu state puma hman turin vawiin khan EF&CC Miniter Pu Lalthansanga'n a hawng.
3. Prime Minister Narendra Modia chuan vawiin khan Pariksha Pe Charcha vawi 9-naah zirlaite nen hun an hmang.
4. India chuan Seychelles chhawmdawlina tur Special Economic Package dollar makataduai 175 a pe dawn.



SAIRANG-SILCHAR RAIL SERVICE

Union Railways minister Pu Ashwini Vaishnaw chuan vawiin chhun dar 12 khan Sairang leh Silchar inkara passenger phur rel service thar a vailiam a;

Sairang leh Silchar inkara passenger rel service tur hi Sairang atangin Thawhlejni, Nilaini, Zirtawpni, Inrinni leh Pathianni-ahte Silchar panin a tlan dawn a, zing dar 7-ah chhuakin chhun dar 12:30-ah Silchar a thleng ang.

Thawhtanni, Thawhlejni, Ningani, Zirtawpni leh Inrinni-ahte Silchar atangin a service dawn a, chhun dar 1-ah chhuakin zan dar 6:30-ah a Sairang a thleng ang.

Sairang Rel Station-a rel service thar hawna inkhawmah Chief Minister Pu lalduhoma chuan, Prime Minister Pu Narendra Modi kaihhraina hnuai a Act East hmalakna zarah Mizoram leh hmarchhak bialte chu ram hmasawna lana hmun pawimawhah a chang chho mek tih a sawi a, Pu Modi-a kaihhraina hnuai a hian hmasawna rualkhai leh kil tin huap kan hmu a, India ram 'Viksit Bharat' a nih nana hmalaknaah hian eng state mah, eng anga hla leh kilkhawr pawh ni se, hlamchhiah an awm lo, a ti.

Railways Minister Ashwini Vaishnaw chungah a lawmthu Chief Minister chuan a sawi a, Silchar hi thenawm mai ni loin, kan sumdawna kalkawng (economic corridor) pawimawh ber a ni a, he rel service thar hian Mizoram leh Assam inkar mai ni lo, India ram hmun dangte nen pawh sumdawna kawngah nasa takin a pui a beisei, tiin, Mizoram sorkar flagship programme 'Hand-holding Policy' kalpuina kawngah a tangkai dawn thu a sawi.

((Byte - Chief Minister)) (Minute 2:11 - 2:45)

Chief Minister Pu Lalduhoma hian Railways Minister hnenah hian Delhi-a an inkawm tuma a thil thlen tawh zinga pathum a thlen nawn leh a, chu'ngte chu - Sairang Railway Station-ah bungraw dahthatna Warehouse leh thlai vawn thatna hmun Cold Storage din tura ngenna te, Delhi-Silchar service chu Sairang Station thleng service tura pawhsei leh Sairang atanga Thenzawl Peace City thlenga rel kawng siam chungchang tifel thuai tura ngennate a ni.



RBI FINANCIAL LITERACY

Reserve Bank of India FINANCIAL LITERACY WEEK chu vawiin khan Aizawl Thakthing Venga Multiutility Centre ah hawn a ni a.

Financial Literacy week hi kum 2016 atang khan ram pumah kum tin hman thin a ni a, kumin hian vawiin atanga ni 13 thleng hun hman a ni dawn a, kumin 2026 thupui atan hian -“ KYC - Your First Step to Safe Banking” tih hmangin Reserve Bank of India Office Aizawl General Manager & Office-in-Charge Pui T. Lhungdim chuan Financial Literacy Van a tlangzarh a, hei hian Mizoram District pathum- Saitual , Khawzawl leh Champhai District-te tlawh in Financial Literacy awareness thehdarh na atan hman a ni dawn a ni.

Financial literacy kar chhunga Aizawl khawpui chhunga FL awareness message thehdarh turin kawngpui thlan bik ah khawpui bus te pawh an tel bawk a, hetah hian passenger te leh mipui te hmuh leh chhiar theih turin, pamphlet hmanga awareness thehdarh a ni dawn a ni.

RBI Office General Manager & Office-in- Charge Pu T. Lhungim sawi danin kumin thupui atan- KYC- Your First Step to Safe Banking a ni a, a tum ber chu banking him leh him tak dinna lungphum atana a dawrtute pawimawhzia tarlan a ni. KYC hi regulatory requirement pawimawh tak a nih thu chiang zawka tarlan chu an ngaipawimawh ber a ni a, zawm awlsam tak a ni bawk a ti.

(BYTE)

He campaign hian mipui te chu bank lam thil chi hrang hrang chulnel tir a tum dawn a, hei hi Central KYC registry a ni a, mipui te chu phone call lem, message lem leh links - KYC Updation nen a inzawm thei, chumi avanga sum chan theih a nih avangin fimkhur tura infuih a ni bawk ang a ti a ni.



FIRE PREVENTION WEEK

Environment, Forest & Climate Change Department bultumin Kangmei Ven Hapta -Fire Prevention Week 2026 chu state puma hman turin vawiin khan EF&CC Minitter Pu Lalthansanga'n a hawng.

Kumin atana Kangmei Ven Hapta thupui chu 'Nungcha tinreng chenna leh tui thianghlim min petu ramngawte, kangmei lakah venghim rawh' tih niin vawiin vek hian District hrang hrangah pawh Kangmei Ven Hapta hi hman tan a ni bawk.

Forest Minister chuan thu sawiin 'Kangmei Ven Hapta 2026' chu mipuite'n kangmei laka fimkhur nachang an hriat thar leh theuhna tur atan te, uar lehzuala invenna kalpui a nih theih nan tea hmalakna a nih thu a sawi a. 'Record-a tarlan a nih danin Mizoram chu engtiklai pawha ram kang/kangmei chhuah thut theihna

hmun a nih avangin kumtluana kangmei laka fimkhur nachang hriat reng a ngai a ni a ti a. Kangmei laka ramngawte veng him tur leh sik leh sa inthlak danglam nasa lutuk tur veng turin mipuite'n zirtir nasat a ngaih thu sawiin, khawpuia chengte chu hma la hmasa tuah tang se a duh thu a sawi.

YMA leh Environmental NGO hrang hrangten ramngaw ven him kawnga an thawhpuinaah lawmthu sawiin, hun lo awm leh zel turah pawh thawh hona tha tak neihpuiah a sawm nghal a; ramngaw ti chereu tam lo tura lo neih dan kalphung tha lehzial a awm theih nan te, hmasawna hna thawh leh environment humhalhte pawh inkhuangrual taka kalpui a nih theih nan, Forest Department chu Prohibitory ni lova Regulatory an nih thute sawiin, Department hrang hrangte nen pawh thawh hona tha tak neih zel a pawimawh thu a sawi a ni.

Kangmei Ven Hapta 2026 hi February ni 9 atanga ni 13 thleng neih tura ruahman a ni a, kangmei venna kawnga hma la thazual khaw pathumte hnenah lawmman pek an ni ang a, khaw dang ti tha pathumte hnenah consolation prize pek an ni bawk ang. Huan emaw, leipui emaw tur atana mimal ram vatte chuan March ni 5 ral hmain an hal tur a ni a, khawtlang theh ram neitute chuan March ni 15 ral hmain an lote chu an hal tur a ni. Lengpui leh a chhehvela lo hal turte chuan tlai lama thlawhtheihna thlawk chhuak leh tum hnuhnung ber hnu lamah chauh an hal tur a ni ang.

<><><>

GINGER

Mizoram Agricultural Marketing Board (MAMB) chuan tun kar chhung atana sumdawngten kut hnathawktute sawhthing an leina man hniam ber tur a bituk thar a, rate thar hi cheng 30-35 inkarah a tlahniam a ni.

MAMB hotute chuan sawhthing rate thar ang hian kut hnathawktuten sawhthing an hralh theih an beisei thu an sawi.

Agriculture Minister kaihhruai MAMB hian kar kalta chhung atan sawhthing man chu cheng 40-45 inkarah a bituk a, mahse, sumdawng zingah sorkarin lei ngam an awm mumal loh avangin MAMB chuan tun kar chhung atan sawhthing man hi a bituk thar a, kar hmasaa sawhthing man aain chawhrualin cheng 10 ang zelin SCC tina a hniam a ni.

MAMB thukhawm hian sumdawngten sawhthing an leina tur zat sorkarin a bituk nan hian Siligury-a sawhthing man zat leh Siligury-a sawhthing phurh thlenna man zatte chu sorkarin a hmang ber a, kut hnathawktute tana hlawk tur siin a man hniam ber tur a bituk a ni. MAMB hian kumin atan district hrang hrangah sawhthing lei/hralhna hmun secondary collection centre (SCC) 64 a siam a; sorkar ruahman dan chuan SCC tina sumdawngten sawhthing an leina man hniam ber (reserved price/floor price) tur chu India ram hmun hrang hranga wholesale market (Mandi) rate enchungin kar tin emaw, a tul ang zelin a bituk dawn a ni.

Kan Corr report lo ngaithla ang.

VC: Mizoram sorkar chuan tunkar chhung atana SCC 64-a sumdawngten sawhthing an leina man sang ber atan kg khat Rs 35 a ruahman a, a hniam ber chu kg khat Rs 30 a ni a; laboratory-a enfiah a nih hnua sawhthing quality tha leh chemical tel loa enkawl organic)-te chu a man a sang bik a, entry point -Vairengte atanga SSC hlat zawng pawhin sawhthing manah hian nghawng a nei bawk.

Hetihlai hian MAMB hruaitute chuan tunlai hian sorkar rate anga hralh tuma Myanmar atanga sawhthing lalut an awm nia an hriat thu an sawi a; dik lo taka sum lakluh tum lo tura mitin nengin, ramri hnaiah chengte chu hetiang dik lo taka thil tih tumte thawhpui lo turin an ngen bakah, dik lo taka thil tite chu hrem an nih tur thu an sawi a ni.

<><><>

HOME MINISTER

Home Minister Pu K Sapdangan, Lengpui leh Sihphir ram Indian Air Force kuta hralh chungchangah inpuhna maksak taka puhtute leh puhte duh tlan dan angin CBI kutah a lut dawn ta a, sawi zui tur a awm tawh loah a ngai a ti.

Vawiina Aizawla ZPM Office-a an party chhung inkhawmah thu sawiin Pu K Sapdanga chuan Lengpui leh Sihphir ram hralh chungchang hi CBI kuta a luh dawn tak avangin Aizawl Municipal Corporation inthlan tur thlir lawka hetiang thawm ring tak siam pawh hian awmzia a nei dawn ta lo a ni, a ti a ni.

Home Minister chuan, financial year tharah police 200 lak leh an tum thu sawiin thalaite lo inring se a ti.

A hmaa Police an lak dan ang bawkin dik takin an la leh dawn a ti a, kum 2021 atangin kum tin Police boral za chuang an awm thin a, kum tin mi 150 vel bawr pension an awm ziah bawk a. Post ruak 4,666 awm mek hnawh turin tunah hian training mek 250 an awm a, a ti.

Kum 2025 kha Police-te chuan fitness uar kumah an hmang a, kum 2026 hi discipline uar kumah an puang ve leh thung tih sawiin. Police-ah chuan posting duhna hmun dil a awm ve lova, a hun takah leh a hmun dik takah engkim tih vek tum a ni, a ti.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

MOCK DRILL

National Disaster Management Authority (NDMA) kaihhraina hnuaiyah wawiin khan Champhai, Kolasib leh Mamit District ah te a rualin Mock Drill neih a ni.

Mock drill hi lirnghing thlen thulha chetlak dan inzirna leh enchhinna niin he hunah hian National Highway-a leimin thleng thei te, relief camp, sawrkar office, bazar leh residential area-a chhiatrupna thleng thei te a tak anga chan a ni.

Champhai Bawrhsap leh Responsible Officer ni bawk Pu Mohammad Aaquib chuan DEOC kaihruaiin hmalakna tur hrang hrang te an ti chhin a, Mock drill zawh hian DEOC-ah debriefing neih a ni a, state level-a thlithlaitu leh district dang nen mock drill chungchang sawiho a ni bawk.

Kolasib khawpui chhung hmun hrang hrangah lirnging a thlen thulha chet lak dan tur enchhinna neih a ni a. Zing dar 9:30-ah tan niin, chhiatrupna thlenna hmuna chet la tur chhanchhuah hna thawktu (Rescue Operation Team) te chu DC Complex kawtzawlah inhmukhawmin, heta tang hian an duty-na hmun tur theuh an pan a ni.

Chhanchhuah hna thawh a nih lai hian DC Conference Hall-ah NDMA Sr Consultant Brig. Ravinder Gurung-a hovin Incidence Response Team te chuan Video Conference hmangin Mock Drill neihna hmun hrang hrangte an vil a. Brig. Gurung hian Kolasib District bakah Mamit leh Champhai District-a Mock Drill neih mekte pawh a vil tel nghal bawk a ni.

Mamit ah chuan Multi State Level Mock Exercise on Earthquake Disaster chu Mamit District Disaster Management Authority huaihawtin, Hospital New Building leh Mamit Bazar vengah te neih a ni. Lirnging thlen thulha chetlak dan tur nunchan zirna neihah hian lirnging avanga chhiatna thleng hrang hrang kangmei chhuak leh hliam leh thite buaipuina hna thawh dan turah nunchan zirna hi kalpui a ni.

<><><>

INDIA-SEYCHELLES

Prime Minister Narendra Modia chuan Seychelles chhawmdawlina tur Special Economic Package dollar makataduai 175 pek anih tur thu a puang. Seychelles President Dr. Patrick Herminie nen New Delhi-a an inkawm hnuah chanchinbumite hmaah he thu hi sawiin Pu Modia chuan heng sumte hi Social housing, E-Mobility, Vocational Trainig, hriselna, ralthuam leh tuipui venhimna lamah hman a ni ang a ti.

Vawiin vek khan India leh Seychelles te chuan thawhdunna tur inremna thuthlung chi 7 an ziak a. Heng inremna te sector hrang hrang niin Health, Meteorology, Electronic and Information Technology leh Good Governance lamte a ni.

<><><>

PM PARIKSHA PE CHARCHA

Prime Minister Narendra Modia chuan vawiin khan Pariksha Pe Charcha wawi 9-naah zirlaite nen hun an hmang. Vawiin khan PM Modia leh zirlaite inkawmhona video pahnihna hi tihchhuah niin exam laia zirlaite rilru hah leh hrehawmna hneh theih dan tur Pu Modia hian a zirtir a. Pu Modia chuan zirlaite chu exam piah lam hun thleng ngaihtuah pha tura chahin thiamthil, infiamna, thil thar siamchhuah leh mimal hmasawmna tur ngaihtuah thleng phak turin a fuih a ni.

<><><>